



**Claudio Lardi n'ha betg pudì persvader tuts davart ses agir pertutgant l'introducziun dal rumantsch grischun en scola.**

FOTO G. VENZIN

# «Nus avain vulì tschentar in term»

Il cusseglier guvernativ Claudio Lardi defenda ses agir en fatgs dal rg

CUN IL CUSSEGLIER GUVERNATIV  
CLAUDIO LARDI HA  
DISCURRÌ GIUSEP VENZIN

■ **En l'arena en l'aula da la scola a Glion è il cusseglier guvernativ Claudio Lardi sa preschentà la mesemna passada. Il minister per ils fatgs da la scola è oravant tut vegnì crititgà per sia politica d'infurmezziun e per la mancanza d'in concept tar l'introducziun dal rumantsch grischun.**

*Signur Lardi, Vos essas vegnì attatgà questa saira pliras giadas.*

**Claudio Lardi:** Jau sun oravant tut engraziaivel dad avair astgà sclerir entgens fatgs, da savair preschentar mia posiziun en in tal gremi. Jau na sun betg da l'avis dad esser vegnì attatgà questa saira. Il cuntrari è plitost il cass.

*L'introducziun dal rumantsch grischun è vegnida fatga el rom da mesiras da spargn. Vos n'havais betg pudì persvader questa saira ils preschents dal cuntrari.*

Jau hai fatg attent che las mesiras A31 davart l'introducziun dal rumantsch grischun en scola na pertutgan betg en emprima lingia las mesiras da spargn. I sa tracta da mesiras strategicas politicas. Nus n'avain betg gì l'intenziun da spargnar immediat blers daners, mabain da tschentar in

term decisiv en dumondas dal linguatg rumantsch.

*En il decurs da la discussiun da questa saira han ins sentì il giavisch da la maioritad ch'il temp è qua per far ensatge.*

## I sa tracta da mesiras politicas strategicas

Jau hai gia detg en la discussiun: Far nagut è medemamain in pass enavos. En la discussiun hai jau vairamain sentì ina tscherta chapientscha ed jau sundel engraziaivel persuenter. Laschar la situaziun sco ella è ussa cun ils idioms, n'è betg in agid per il rumantsch.

*Questa saira èn exponents dal linguatg e da la politica sa participads a la discussiun. Il pievel è dentant anc adina encunter il rumantsch grischun.*

Jau na sun betg uschè segir ch'il pievel saja encunter il rumantsch grischun. Ils ins pretendan che la populaziun rumantscha saja encunter il linguatg unifitgà ed ils auters pretendan

che la maioritad saja cleramain persuenter. Uss èsi l'incumbensa da nus tuts, da las instituziuns rumantschas, dals parlamentararis, da las medias e sa tgapescha era da la regenza da preschentar uschè blers arguments per il rumantsch grischun sco pussaivel. Usche san ils pertutgads, la populaziun, far in parairi davart il rumantsch unifitgà.

*Vus avais gia menziunà en la discussiun la sensibilisaziun. Sto betg gist era la regenza prestar qua lavur per gulivar in pau las undas. Ils fatgs dal linguatg vegnan savens discutads a moda emoziunala. U stais vos qua da la vart e surlaschais quai a las organisaziuns linguisticas?*

## La situaziun actuala n'è betg in agid per il rumantsch

Pertutgant il rumantsch grischun en scola na pon las organisaziuns linguisticas betg distgargiar la regenza. Quai è ussa noss pensum. Jau vegn a dar l'incumbensa da crear in concept da basa. Sin fundament da quel concept vegn jau a sespruvar da declerar uschè bain sco pussaivel il proxim agir.